

■ DA LA VITA DA LUDMILLA CAHENZLI

# Il stift da citrona ed ina visiun

En la partiziun da cosmetica dal Migros hai jau in da quests muments ch'jau sai tuttenina insatge ch'jau n'avev tut ils onns e decennis avant mai realisà – forse ina visiun.

Per il solit dovr jau circa diesch secundas enfin ch'jau hai chattà mes schampo en la partiziun da cosmetica. Oz sto mia gronda dentant cumprar in levzagl ed ella dovra exnum mes cussegl, sco ella di. Jau hai dubi ch'ella dovria plitost ils daners en mia bursa. Ma basta, jau ma chatt pia en la partiziun da cosmetica e ma sent in pau estra. Jau hai adina in tschert respect da tut quests spievelets, levzags, gloss, penels, cupins e cupets.

Entant che mia figlia emprova ora tuttas colurs da tuttas marcas da levzags, emprov'jau da m'orientar davart ils novs trends en la cosmetica. Tuttenina ma dat en egl in stift cun la color da citrona. Fascinada prend jau il stift or dal chaschutt. «Per tge dovrans ins quest stift?» dumond jau mia figlia. «Quai mettan ins si enturn ils egl. I fa ch'ins ha in'egliada pli frestga. En sazez dovrans be mattas giuvnas questa color», di ella ed aschunta: «Jau sun gia memia veglia per da quai.»

In pau trumpada dost jau il stift enavos en il chaschutt. Jau avess propi gi gust da posseder quest uten-

sil da smincar, ma sche mia figlia da schotg onns è gia memia veglia, n'è la color da citrona mettain era betg adattada per dar dapli expressiun a las faudas enturn mes egl. U duess jau forse tuttina cumprar il stift? La color ma plascha enorm bain. Jau pudess simpla-main empruvar, forse sun jau gea puspè en ina vegliadetgna ideala per effects da citrona enturn ils egl? Sch'i na funcziuna betg pos jau anc adina dar il stift a mia pitschna.

Mia figlia dovra ina permpetnadad. Cun il temp vegni lungurus en la partiziun da cosmetica. Jau sun malidia e fatsch attent ella che las plunas levzags e gloss ch'ella ha a chasa sin la curuna avant il spievel bastian en sazez. «Na, jau dovr in levzagl che ha exact la medema color sco quel ch'jau hai pers l'emna passada», è sia resposta. «E tge è pia uschè spezial vi da questa color?» dumond jau. «Quel è ideal per ir a scola.»

En quest mument hai jau mia visiun. Dad ina secunda sin l'otra realisesch jau: Cumpareglia cun mias figlias, hai jau gi ina bellezza giuventetgna. Simpla, banala, nuncumplitgada e libra da la dictatura cosmetica e da moda. Sco giuvna hai jau mintga di tratg en il medem. Ina chamischa alva, baracca e jeans veglias cun tantas scrottas sco pussaivel. Cun questa mondana sun

jau marschada atras mia pubertad.

La damaun na duvra jau strusch far tualetta, pertge make up era da mes temp mo insatge per femnas veglias e levzags duvran mo dunnas cun pouca segirezza da sazez, pia paupras creatiras. Far si chavels na faschev'jau ord princip betg, nun che mia mamma ma traplava e sa postava davant porta cun ils plets: «Uschia na vas ti betg or da chasa.» Ella na chapiva simpelmain betg che chavels spalads vesevan ora blier meglio che frisuras pulitas. Ozendi dovrans las dunnas giuvnas aposta schampus da volumen, ina pflegespühlung e gels da tuttas guisas per cuntanscher exact l'effect ch'jau cuntanscheva pli baud cun mai far si chavels.

Finalmain mitschada ord la partiziun da cosmetica ed arrivada a chasa emprov jau ora mes nov stift da citrona. Mias faudas vesan tuttenina ora pli frestgas e mia egliada para insaco gagliarda. Entant ch'jau dun si anc in zichel dapli citrona, ma dumond jau tuttenina: Tgi sa cun tge che mias figlias frestgentan si en ventg u trenta onns las faudas enturn ils egl? Color da citrona na vegn strusch a bastar. I ma va afraid dal dies giu ed jau emprov immediat da derschentar mia visiun malempernaivla dal begli giu.

Ludmilla Cahenzli